

**Pengebumian negeri untuk Lim
Malaysiakini.com
November 25, 2010**

Kerajaan negeri Pulau Pinang akan memberikan penghormatan pengebumian negeri kepada bekas ketua menteri Tun Dr Lim Chong Eu, yang meninggal dunia pada jam 9.07 malam semalam.

Mendiang dimasukkan ke Hospital Pulau Pinang selama hampir sebulan akibat serangan angin ahmar dan tidak sedarkan diri hingga menghembuskan nafas terakhirnya.

NONEketua Menteri Pulau Pinang Lim Guan Eng berkata beliau akan membuat satu pengumuman rasmi mengenai kematian bekas ketua menteri itu hari ini.

Lim, yang berada di Hong Kong bagi urusan negeri, semalam dalam satu kenyataan berkata beliau berasa sedih dengan kehilangan Dr Lim.

"Saya dimaklumkan mengenai kematian Tun (Dr Lim Chong Eu) oleh anak lelakinya Lim Chien Cheng pada pukul 9.34 malam dan saya, bagi pihak Kerajaan Negeri Pulau Pinang, mengucapkan takziah kepada Lim Chien Cheng dan keluarganya.

"Saya akan pulang dari Hong Kong ke Pulau Pinang esok (hari ini) dan akan membuat pengumuman rasmi," katanya kepada Bernama.

Mendiang Lim berusia 91 tahun.

Sementara itu, anak sulungnya Lim Chien Aun berkata Dr Lim meninggal dunia di rumahnya di Tanjong Bungah di Georgetown setelah dibawa balik dari hospital itu pada jam 7 malam semalam.

"Beliau menghembuskan nafas terakhir di sisi keluarga di rumahnya," katanya kepada pemberita.

Ketua menteri kedua Pulau Pinang itu dilaporkan berada dalam keadaan koma sejak dimasukkan ke Unit Rawatan Rapi (ICU) sebulan lalu.

Beliau meninggalkan seorang isteri Toh Puan Goh Sing Yeng, 85, dan empat orang anak.

Mendiang Dr Lim menjadi ketua menteri Pulau Pinang selama 21 tahun mulai Mei 1969 hingga Oktober 1990 dan menerajui parti Gerakan selama sembilan tahun mulai 1971.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/149108>